

2 PEDRO

Yi Mimetzpi Necy Huidibi San Pedro Yajniguejx Yi Mibijcpidijc

1 Hich Simón Pedro, tumbich ma Jesucristo ytung. Yi' xy'apóstol'ajtpich etz ngapxhuäcxpyich yi' y'ayuc. Cham iich miich ajcxy jada necy nyajnijayiiygixy huidibi ajcxy ti mbaatcixy mibijcin janch oybi, tim jadu'n nej iich ajcxy ti nbáatcixyich mibijcin janch oybi. Hich ajt nDios je Jesucristo huidibi xyajnidzoocim ajt n'alma tudägy je', e tudägy ytuñ miid iich ajt nidüg'óciy. ²Huen Dios mijmay'ajt tunipy miid miich ajcxy, etz jotcujc'ajtin xymöhuipy mijcajee, miid co tiy'ajt ti mbaatcixy ma Dios etz ma je Jesús iich ajt nHuindzin.

Je mibijcpidijc chinaayin jugy'ajtin

³Dios miid je' ymij'ajt ti xymooyim tüg'óciy huidibi nyajmayajtim ma ajt njugy'ajtin, nej huaad nguyduunim yi' ytiy'ajt etz nej yi' huaad nyajmij'ajtim. Dios jadu'n mijmay'ajt tuun miid iich ajt ycixpi co ti xyajnejhuiiyim Jesucristo y'ayuc ytiy'ajt. Je Jesucristo ti xyhuin'ijxim jigix jëbi nmiid'ajtim yi' ymij'ajtin y'oy'ajtin, etz jigix jëbi nduunim oyjäy'ajtin

nej Jesucristo tuuñ. ⁴Dios ti xymooyim huidibi janch oydi'cni e janch copicyip jigix jëbi miich ajcxy mbaatcixy Dios yjihui'n ymic'ajt huidibi xyajtzinaaygixy miid huädz jot huinma'n, etz jigix jëbi miid jada ycixpi tiibi xyaj'ahuaniiyim, miich ajcxy mijjpyöyduutcixy je jibicpi huidibi naaxhuin'yäy ajcxy ñijot'ajtcixyp. ⁵⁻⁷Com Dios miid ymic'ajt ti xymooyim huidibi nyajmayajtim, paady ycixp miich ajcxy naymic'ijxigixy co ajcxy mmibijcin mjacyajmijtigfiygixipy tudägy'ajtin; e miid mdudägy'ajtin mjacyajmijtigfiygixipy ajcxy Dios y'ixpijcin; e miid je Dios y'ixpijcin mjacyajmijtigfiygixipy yi Dios yjihui'n ymic'ajt ma ajcxy mjot mhuinma'n huidibi miid mmimadägiy ajcxy yi jibicjot jibic-huinma'n; e miid je mic'ajt ma ajcxy mjot mhuinma'n jacyajmijtigihuipy ajcxy mecxtujcin; e miid je mecxtujcin mnejhuifiygixipy nej jëb huaad myajmij'ajtcixy etz mdzigiigixy Dios; e miid je mecxtujcin mjacyajmijtigfiygixipy je tzojcin

je jihuiyin miid migügtijc; e nañ migtigihuipy nañ jadu'n je mibijcin nej jëb huaad Dios myajmij'ajtcixy etz nej jëb huaad cixyot huinijot mjacyajtungixy oyjäy'ajtin.

⁸Pen ma miich ajcxy mdzinaayin mjugy'ajtin yajpattäy e ymijy ymayy, yi mjugy'ajt ajcxy ca' yi' ñaadig'aty; nañ ca' anajty ajcxy naadigi' ti mmibijccixy iich ajt nHuindzin Jesucristo, ti mnejhuüyigixy yi' y'ayuc ytiy'ajt.

⁹Pin jada ca' capxymidooy tüg'óciy jadayaabi capxhuijin ma yjugy'ajtin, jadu'n yi' nipaady nej tüg huiintzpi o huidibi y'ijxin con, ti jäydigoy co Jesucristo ti yajpocyñihuaatzp.

¹⁰Paady ycixp miich ajcxy migügtijc, naymic'ijxigixy tungix tüg'óciy jada jigix mnejhuühuipy ajcxy tiydudägy co Dios ti xyajmibijccixy e ti xyhuin'ijxcixy. Pidaaccix mhuinma'ñ co jada tiy'ajt huen copicy, huen tictztigiy ma miich ajcxy mjugy'ajtin. E pen mdumyb ajcxy jadu'n, nimina mgapocycägixipy. ¹¹E jadu'n miich ajcxy myajmöhuiipy tiydudägy tigiycac mijpi ma iich ajt nHuindzin Jesucristo y'ane'my, je huidibi xyajnidzoocim ajt n'alma. E yi' y'ane'min ca' ycixipy ytigoyipy nimina.

¹²Paady ycixp iich miich ajcxy jatyimy yajjäymejtzcoodaangixy jada tiy'ajt. Oy miich ajcxy jada tiy'ajt mjaajtcixy mjanehuüyigixy, e tudägy ajcxy mmibijccixy etz mmi'ijtcixy je tiy'ajt huidibi miich ajcxy cham miid. ¹³Minaambich co yjanchity nami njactzinaayñich co iich miich ajcxy nmöhuiipy capxhuijin. ¹⁴Iich ajt nHuindzin

Jesucristo ti xyajnehuüyich co tzojc n'ixmadzipyich jada njugy'ajtin (n'ögibich). ¹⁵Paady ycixp naymic'ixyijich mictägy ma miich ajcxy co ngapxhuijicixy jigix co anajty n'ögyich mjäymetziiyb ajcxy tüg'óciy jada tiy'ajt.

Yi' ajcxy huidibi y'ijxy je Cristo ymij'ajtin y'oy'ajtin

¹⁶Iich miich ajcxy ti nyaj'ixpicy je tiy'ajt maabi nHuindzin Jesucristo, jadu'n nej Dios ymij'ajt miidty, e jadu'n nej je' yhuimbida'ñ jadüg'oc ya naaxhuñ. E ca' iich ajcxy nyaj'ixpicy nigoo'ayuc ani'ayuc huidibi ci'm ti ngojyich ti nmacxyich. Miid iich ngi'mhuuin ti n'ijxcixyich je Huindzin Jesús ymij'ajtin. ¹⁷N'ijx iich ajcxy co je Dios Teedy mooy ajt nHuindzin Jesucristo oy'ajt etz mij'ajt. E nañ nmidooyich ajcxy ayuc choñ ma je oybi Dios y'it, xyñimaayi: "Jada je' iich n'ung huidibi ooy ndzocyich njihuüyich, e ooy jotcuje nayjihuüyijich miid yi' ycixpi."

¹⁸Iich ajcxy nañ jadu'n ci'm ti nmidoogixyich je ayuc huidibi anajty tzomb tzajpjoty. Jim iich ajcxy anajty quipxyi miid je Huindzin Jesús ma je amay gop.

¹⁹Nañ jadu'n nmiid'ajtim je ayuc jac'oybi jactiyyi. Je' je' je tiy'ajt je ayuc huidibi ajcxy yjay je Dios y'ayucnajtzcaxiiybi jecy'ajty. Oy miich ajcxy oybi mduñ co m'amidoo'ijtcixy je oybi tiy'ajt maabi Jesucristo huidibi jadu'n nipaady nej tüg jiin tiicxp agootztuum etz jadu'n nipaady nej je xii co yxiimiydäy, etz jadu'n nipaady nej je mijmadza'

jayhuixtujcpi co ypidzimy. Jada tiy'ajt xycodiicxip ajcxy mjet mhuinma'n. ²⁰Cuendtungix miich ajcxy jada: tüg'óciy je tiy'ajt, huidibi Dios ytiy'ajtmiiidpi yejc huidibi ijt pjaybety ma Dios ylibro, ca' huaad pin yajnigejip miid yci'mhuinma'n. ²¹Com je Dios y'ayucnajtzcaxiibi camina je' ajcxy ayuccapxhuäcxy miid yci'mdzojcin yci'mhuinma'n. Dios anajty ajcxy huin'ixyip jëbi ayuccapxhuäcxy miid Dios ycixpi com je Espíritu Santo anajty ajcxy mooyip ayuc huidibi ajcxy ycapxhuäcxy p.

Yi' ajcxy huidibi yaj'ixpijcp anii

2 Per nañ ji anajty nañ jadu'n ayucnajtzcaxiibi huidibi anajty ajcxy aniidaacp ma je Israel jäy. E nañ jadu'n yji'adipy ayuccapxhuäcxi huidibi anii yaj'ixpigipy ma miich ajcxy. Je' ajcxy ayüch ameech yaj'ixpigipy yci'm'ayuc yci'mhuinma'n huidibi ajcxy yajhuinma'nydigooyipy je mibijcpidijc. Ymina'n ajcxy co ca' yjanchity je Huindzin Jesús y'ayuc, je huidibi yajnidzooc ajt n'alma, e jadu'n ci'm ñay'ayo'nmóoyigixy miid Dios mic'amy. ²Mayjäy ooy panicxa'n je jibicpi huidibi ajcxy ytungixyp, e miid je' ajcxy ycixpi yajni gápipy yajnimidyägipy ajcxy jibic je huidibi ajcxy cuydumb je tiybi ayuc, je Jesucristo y'ayuc oybi. ³Miid co anajty tzach'adzojccixy meñ, chi anajty xyhuimbijccixy xyhuimmeetzci xy miid ajcxy y'ixpijcin ca'p yjanchity. Per je pocycähuin ajcxy ahuijxip, ca' ma ñidzooy. Ti yjejcní maabi

ajcxy ypocyca'ni ma Dios. Dios tzaachytuniib ajcxy miid ypocy ycixpi.

⁴Dios ca' je' huinmeecxy je ángeles ajcxy huidibi tundigooygixp. Hue' janchtiy ycötijnajxtaayb ayoodactuuyb etz yajhui'my agootztuuyb, cadeniijy y'ijtcixy cuend'aty, ixti cooni anajty paady xii tiempo co anajty yajtiyduna'n naaxhuiniyjäy miid ypocy ycixpi. ⁵Nañ ni ca' Dios huinmeecxy je naaxhuiniyjäy huidibi tundigooy jecy'ajty. Chi quejxy ayo'nduu etz mijniigom ma je jibicjäydijc. Jëyi yajtzoocy je Noé huidibi capxhuäcx je tiy'ajt. Quipxy miid Noé yajtzoocy jahuixtujc y'amigügtijc. ⁶Dios nañ jadu'n tzaachytuñ miid ypocy ycixpi etz yajhuindigoy miid jiin metz cajn, Sodoma etz Gomorra, ixti cooni yajhui'my accuyjam jigix y'idipy je iixpejt ma je jibicjäydijc huidibi ajcxy jac'axam jactzinähuam jacjugy'adam. ⁷Dios yajtzooc je Lot, hue' je' anajty janch oyjäy, e janch ymiid anajty jotmay co anajty je jibicjäydijc ajcxy iixi chinaayin yjugy'ajtin janch jibic. ⁸Jabom jabom anajty je Lot, je jäy oyjäybi huidibi anajty tzinaayb quipxyi miid je jibicjäydijc, ni ca' anajty yjotcujc'aty co anajty ixy midoy nej anajty ytundigooygixy je jäy ajcxy ca'pi ytudägyity. ⁹Dios miid mic'ajt jëbi nihua'n yajtzögy pinjaty mibijccixp cixyjot huini jot co je mujcu' yjot'ijxigixy huinma'n'ijxigixy. Nañ jadu'n Dios mic'ajt miidity jigix jëbi yaj'ijtcixy je jibicjäydijc miid tzaachypi ayo'n, huidibi ymöhuamy co anajty

naaxhuiñyäjy tiyduñ miid ypocy ycixpi.

¹⁰Dios ymiid mic'ajt jëbi tzaachytunipy pinjaty tumb jibic-huinma'ñ nej ñinixc nijot'ajtcixy, e ca' ixaangixy je Huindzin Jesús y'oy'ajtin ymij'ajtin. Amij agix etz jotmic ajcxy nayjihuiy. Ytumb ajcxy yci'mjot yci'mhuinma'ñ. Ni ycatzigiigixy co oyñinej ajcxy ni'ojiigixy pinjaty mic'ajt miid ma Dios ytung. ¹¹Oy je ángeles ajcxy miidity mijcötujcin etz ane'min, ca'p je' ajcxy yjot yhuinma'ñ miidity nicxy ni'ojiigixy ma Dios yhuinduu pinjaty mic'ajt miid ma Dios ytung.

¹²Per jadayaab jibicjäydijc ajcxy jadu'n ajcxy yi' nej iyujc, ca' yhuinma'ñ; nigoob ytimyhuidity etz yma'xun'ajtcixy jigix jäy ymadziyb etz yaj'ögiyb. Ñixiicpy yaxiicpy ajcxy yi' huidib ca' huinjihui'y. Per nañ tim jadu'n ajcxy y'ögipy nej iyujc y'ögy ytigoy. ¹³Cobadihuaangixy jadu'n nej ti ytundigoogixy. Hue' nayjihuiygixy capin yjadu'nity, yxondaaccixy tüg jaxicyjaty. Jadayaab jäy ajcxy pocy ypa'tcipy ajcxy yi' chinaaygixy yjugy'ajtcixy. Tüg tzo'ydu'n co ajcxy nañ jadu'n xymiyyöybejtcixy ma m'amugiigixy.

¹⁴Co ajcxy huindiicxcixy töxyjäydijc, chi ajcxy ooy nijot'ajtcixy co miid tundigoya'ñ. Ca'p ajcxy ch'jpigixy y'anucxiygixy miid pocytunii. Yajtundigoogixy pinjaty amútzip ma mibijcin, ooy ajcxy yhuijity ycuycity ycohuinma'ñity ma meen'adzoogii. Dios yajtigoyiib ajcxy y'alma.

¹⁵Tigoyjäy yi' ajcxy, je' co ti ñiidigajtcixy ti ytüdigajtcixy ma je tiybi je janchypi tiy'ajt. Je' ajcxy ypanicxy ypayöyp je profeta Balaam y'ijxpejt, je Beor y'ung, co ooy ymeen'ybada'ñ anajty miid yjibic-huinma'ñ. ¹⁶Chi Balaam oy yaj'ojyii ypocy tüg töxyburro, ycapxy jadu'n nej tüg jäy, e jadu'n je' yajhuäcxipy je profeta Balaam miid je' ylocihuinma'ñ.

¹⁷Com jada jäy ajcxy ca' panicxcixy je janchypi tiy'ajt, paady ycixp jadu'n ajcxy nipaady nej tüg niipozojut ca'pi ñii miidity, etz jadu'n ajcxy nipaady nej joc huidibi poj yajyöyip (ca' ytu'y). Dios möhuiib ajcxy tzaachypi miid ypocy ycixpi, idam ajcxy agootztuuyb huinixii huinitiempo. ¹⁸Com ycapxyp ajcxy ayuc huidibi ca' choubaady. E miid je jibic-huinma'ñ ycixpi huidibi ajcxy chachnijot'ajtpy yajtundigoogixy pinjaty tiibi choongixy ma je huidibi ajcxy tzinaayb miid jibic-huinma'ñ. ¹⁹Yi' ajcxy yaj'ixpijcp je mayjäy co jëbi tungixy huentim ti huidibi ajcxy ñijot'ajtpy. Per yi' ajcxy huidib jibic-huinma'ñ yaj'ixpijcp, ci'm ajcxy ñay'ijtigixy pocypa'tcipy, je pocy tzach'ane'mb ajcxy yjot yhuinma'ñ, ixti jadu'n nipaady nej jihuiy ajcxy ane'my y'ity. ²⁰Pinjaty ti ymibijccixy ti ñejhuiygixy je Huindzin Jesucristo ytiy'ajt huidibi yajnidoocp ajcxy y'alma, e jadu'n ti yjihüäccixy ma je naaxhuiñyäjy yjibictzinaayin yjibicjugy'ajtin, pen jadüg'oc anajty y'ayöyiyñip ma je jibicpi, e je jibicpi ymimadägyii ajcxy, o'ctiy anajty nigi yhui'mgixy ca'ydi nej

je jayijp'atypi. ²¹Nīgi oy co ixypiy je' ajcxy ca' ytimnejhuiygixy je janchyp'i tiy'ajt. Com ti ocnejhuiygixyp, e chi jada' y'ixtigihuaccixy ma je huätzpi Dios ycötujcin huätzpi Dios ytiy'ajt tiibi anajty y'ocjamóoyigixy. ²²Per je' yi' ajcxy ytimycuydumy nej je ayuc y'ity: "Je uc yci'm'ich ñihuimbijtpy, e je idzim huidibi namdziidaayb, nicxy je' yajtnip yquitnyp mo'ntzjoty jadüg'oc."

Je Huindzin Jesús huimbidaamb ya naaxhuiñ

3 Miich ajcxy migügtijc huidibi iich ooy ndzocyich ooy njihuüyich, jada je' je mimetzpi necy huidibi ajcxy nyajnijayiyb. Ma jada metzpi necy hue' iich ndzoga'ñich co nyajhuinma'ñymedzip ajcxy ma Dios ytiy'ajt miid jada capxhuijin huidibi ti njaayich. ²Ti nnijayiygixy jigix m'ajihuühuiyb ajcxy je ayuc huidibi ajcxy pa'tcipy'aty ñajtzcapxiy je Dios y'ayucnajtzcaxxiyb ajcxy huidibi huadz yhuinma'ñ anajty ymiid. Nañ ajihuüyigix je Huindzin Jesucristo je' y'ane'min huidibi yajnidzooc ajt n'alma, je ane'min huidibi apóstoltijc miich ajcxy xyajnimaaayb.

³Nejhuiygixy miich ajcxy jada jayijp ma yam ca'ni yhuaad'ajtni mina naaxhuiñ ycixipy, miinip jáy ajcxy huidibi nixigip yajxigip huidibi Dios yjé'ajtpy. Chinaaygixy yjugy'ajtcixy anajty miid jibic-huinma'ñ huidibi ci'm ñijot'ajtcixyp. ⁴Chi ajcxy ymina'nip: "¿Ti co mdzachmibijccixy co Cristo yhuimbida'ñ jadüg'oc ya

naaxhuiñ? Nej ajcxy je' y'o'ctay je mij'ap je mijteedy, je'ni y'ijttäy tüg'óciy jadu'n nej naaxhuiñybi chondacy. Paady ca' yjanchity co je Cristo yhuimbida'ñ jadüg'oc ya naaxhuiñ," jadu'n yminaangixy. ⁵Yi' ajcxy ca' huinjihuühuaangixy cuendtunaangixy co miid Dios y'ayuc yi' tzajp ji'ajtp anajty yi' tzachjecyip, e miid Dios y'ane'min huin'it je naax oy yguëxigy huidibi ijtp anajty nijoty. ⁶Nañ jadu'n miid Dios y'ayuc je jecy'ajtpy naaxhuiñyjay y'ayo'nbaty, ñijicxday nidüg'óciy e ytigoyday nijoty. ⁷Per Dios miid yi' y'ayuc yaj'ijtpy jada naaxhuiñybi etz tzajp huidibi cham ji'ajtp ixti coon yajtigoydähuipy miid jiin. Je jiin huin'it je' nöctähua'ñ co anajty yhuaad'ajtni ma Dios tiyduna'ñ je camadacpidijc je jibicjäydijc, etz yajtigoya'ñ ajcxy y'alma.

⁸Jadügnax miich ajcxy migügtijc huidibi ooy ndzocy njihuüyich, ca' mjäydigooygixy co ma yi' Huindzin Dios, tüg xii jadu'n yi' nej tüg mil jimijt, e tüg mil jimijt jadu'n yi' nej tüg xii. ⁹Ca' nminaanim co yi' Dios yajhuäcxibaamyñi yi' mina cuyduna'ñ huidibi yi' ti ahuanüy, jadu'n nej nijëjity jáy a'ixiigixy. Dios yajtumyb mecxtujcin miid miich ajcxy, com hue' yi' tzocy co ni tüg jáy ayo'n paadipy. Yi' chojcpy co nidüg'óciy jáy huen jothuimbijtcixy etz ixmajtzcixy pocytoni.

¹⁰Co anajty je Huindzin Jesús ymiin jadüg'oc ya naaxhuiñybi chaachytunipy je' tüg'óciy jibicjäydijc, hue' je' ytuniyb yjadiiyb ma anajty ca' pin jijp'ixy,

jadu'n nej tüg meetzpi ymiin coodz co meedza'n tijaty. Huin'it je tzajp yhuindigoydähuipy miid tüg ne'min jidijtin oychigiinyñ. E tüg'óciy huidibi miid ndzinaayim njugy'ajtim toydähuip yi' miid jiin, yi naax toydähuip yi', etz tijaty yajpatp ya naaxhuiñ toydähuip nañ jadu'n.

¹¹Com tüg'óciy tijaty huidibi jiajtp yhuindigoydähua'n miid jiin, paady ycixpi nigi copicy miich ajcxy co mdzinaaygixp tudägy e myajmij'ajtcixyp Dios. ¹²Ahuijxcix ajcxy je xii tzuu mina Dios anajty yajhuaad'aty co yajhuindigoya'n je naaxhuiñybi. Naymic'ijxigix co tzojc yminipy yi jadu'mbi xii tzuu. Co yhuaad'ajtnip huin'it xii, je tzajp yhuindigoydähuip miid jiin; je xii po', je pojx xemembi, je tuu enee jadu'ñyi yticxtähuipy yjiydähuipy jiiñjoty. ¹³Per iich ajt n'ahuijxim je jemybi tzajp jemybi naax huidibi Dios ti xyaj'ahuaniiyim, tüg tzinaaydac janch'oybi ma ca' ti jibicpi.

¹⁴Paady ycixp miich ajcxy migügtijc huidibi iich ooy ndzocyich njihuüyich, nami m'ahuijxyp miich ajcxy co Dios yajhuindigoyaanip jada naaxhuiñ, naymic'ijxigix ma tüg'óciy ajcxy yi mdzinaayin co mguydunipy ajcxy Dios ytiy'ajt jigix ajcxy Dios xypaadipy, ca' ajcxy ti tzip ti gapxy, ni ti jibicpi, e ni ti pocy, ac huädz jot huädz

huinma'n anajty miid'ajtcixy.

¹⁵Cuenditungix je mecxtujcin huidibi iich ajt nHuindzin Jesucristo yajtumyb miid iich ajt jigix jébi xyajñidzoocim ajt n'alma. Nañ jadu'n yi', iich ajt nmigüg Pablo huidibi ooy ndzojcin, ti miich ajcxy xyñijayiiygixy, jadu'n nej ixpijcin Dios ti ymöyii ma yi' y'ayuc. ¹⁶Ma tüg'óciy Pablo ñecy tiibi xyajniguejxcixy, jada tiy'ajt ti xyajmiidmiydaaccixy. Nijējity Pablo ñecy ooy chachchiphuinjihuiyñity, e nijējity jāy ajcxy tigach ajcxy huinjihuüy Pablo y'ayuc, ca' ajcxy huinjihuüy nej Pablo yjamina'nañ. Huingjaty ajcxy ñiguej Pablo y'ayuc, e ci'm ñayyajhuinma'ñydidigóoyigixy.

¹⁷Paady ycixp miich ajcxy migügtijc huidibi ooy ndzocy njihuüyich, miich mnejhuiydaaygix jada tiy'ajt. Nayguend'ajtigix ca'ydi jibicjäydijc miid y'aniñ xyajñidigajtcixy xyajtüdigajtcixy, e ca'ydi m'ixtigihuäccixy ma ajcxy mmibijcin jadu'n nej tiydudägy ti mmibijccixy. ¹⁸Huen iich ajt nHuindzin Jesucristo huidibi yajñidzoocp ajt n'alma nigi may'ajt oy'ajt tunipy miid miich ajcxy, e nañ nigi yujcpedipy ajcxy yi m'ixpijcin ma yi' ytiy'ajt. Huen Jesucristo cōmay y'idipy etz m'idipy oy'ajtin mij'ajtin jadachambi xii tiempo etz jadu'n nej xii tiempo miimb cidacp. Jadu'n ngapxycixyich. Amén.